

Voces de Queempostela

Folleto Mensual
de Información

Nº11, Marzo-1997

Editado polo
Colectivo Gai de
Compostela

O PP dixo non

O pasado 18 de marzo votaba-se no Congreso dos Deputados a toma en consideración dos proxectos de Lei de Parellas apresentados no seu dia polo PSOE e por EU/IC. Nesta votación decidiase o comezo do trámite parlamentar dos devanditos proxectos. Co apoio de Convergència i Unió, o Partido Popular votou en contra desta toma en consideración, pero ao non contar co apoio do PNV, a votación deu lugar a un empate. O mesmo resultado se obtivo nunha segunda votación minutos depois. No descanso para abordar unha terceira votación, membros do PP foron buscar os deputados de Coalición Canaria para recadar o seu apoio. Tras unha rápida negociación, Coalición Canaria votaba, xunto co PP e CiU, en contra da toma en consideración dos proxectos de lei. Polo tanto, a posibel aprobación dunha Lei de Parellas fica aprazada. O Congreso decidiu criar unha subcomisión de estudio dos proxectos apresentados que deberá emitir un informe sobre o seu impacto e necesidade social a finais de xuño. Tanto os grupos favorábeis á Lei de Parellas como os colectivos de homosexuais pensan que esta subcomisión non é máis que unha escusa para paralizar a aprobación da lei. Os colectivos de gais e lesbianas, ademais, están a pensar en medidas de presión más contundentes, como o "outing" d@s parlamentari@s que votaron en contra. Pola sua banda, o CGC manifestou mediante un comunicado de prensa a sua protesta ante os feitos acontecidos no Congreso, que tacha de falsos e antidemocráticos. Así mesmo, o CGC está tamén a pensar noutras posíbeis accións de protesta para os vindeiros meses.

Retraso na saída á rua do novo número do Shomos

Con algo máis dunha semana de retraso sai á rua o número 13 do Shomos, que recolle a actualidade do pasado mes de inverno. Este retraso debeuse a problemas da casa de impresión co soporte informático no que fora maquetada a revista. Este novo número conta cun prego máis que o anterior, é dicer, ten 28 páxinas, e recupera un soporte máis duro para a portada. O papel reciclado empregado é máis branco. Outra novidade a respecto do voceiro anterior son as fotos que contén, máis grandes e numerosas. A comisión do voceiro xa está a preparar a edición do número 14, o de Primavera-Verán, que sairá antes de finais do mes de xuño. Para enviaras queixas, suxestións ou colaboracións (gráficas e/ou escritas) escrebe ao apartado do CGC. Lembra tamén que pór un anuncio no Shomos é totalmente gratuito.

Éxito da festa na Conga

O pasado 5 de marzo celebrou-se ao fin a festa programada pola Comisión de Actos Lúdicos e Culturais para o mes de inverno. Ainda que non se pudo contar finalmente con nengunha actuación, o xogo das mensaxes animou a festa. O éxito de público cubriu ben as expectativas da Comisión, que organizou unha votación paródica para eleger a Raíña de Inverno. Tamén se elegeron Miss Simpatia, Miss Desexo e o Prémio a Toda unha Carreira. A Comisión de Actos Lúdicos e Culturais está a pensar xa na posibilidade de organizar unha nova festa antes do mes de xuño. Se queres dar ideas sobre esta ou outras actividades lúdicas non deixes de lle escreber á Comisión utilizando, como sempre, o apartado.

Máis colaboración coas lésbicas

O pasado 17 de marzo o CGC celebrou unha asemblea extraordinaria centrada no aumento da colaboración coas lésbicas do noso país. Na reunión acordou-se dar-lle máis cabida á expresión e realidade lésbicas nos meios de comunicación do colectivo. Tamén se acordou incluir "e lésbicas" na redacción de textos e comunicados que expresen obxectivos comuns. Así mesmo, a asemblea insistiu no ofrecemento da infraestructura do CGC para o uso das lésbicas de dos seus colectivos. Con estas medidas, a asemblea do CGC quer propiciar un achegamento e un maior coñecimento das homosexuais, que até o de agora en contados casos se achegaron até o local do CGC.

O Centro Xove segue aberto

Os e as profesionais e voluntári@s que traballan no Centro Xove de Anticoncepción e Sexualidade seguen, mália os obstáculos postos pola administración galega, prestando os seus servizos. O local do centro, que agora ocupa o Coléxio de Psicólogos da Galiza, trasladou-se á Rua do Hórreo nº33. Lembra que neste Centro, ademais de información e condóns de balde, tamén tes direito a unha atención personalizada e confidencial, sen a obriga de apresentares a carta do SERGAS.

Pergunta parlamentar do BNG

No pasado mes de marzo o deputado do BNG, Bieito Lobeira, realizou unha pergunta no Parlamento da Galiza sobre o coñecimento que ten o goberno autónomo das agresións homofóbicas que sufren a cotío moit@s homosexuais do noso país. Así mesmo, Lobeira pergunto sobre as medidas que ten programadas ou pensa programar o goberno para solucionar esta situación. A pergunta do parlamentario nacionalista produciu-se a raíz do informe sobre agresións homofóbicas que lle fora remitido polo CGC. Os servizos sociais da administración autonómica, aos que tamén se lleva

enviado o informe, non tiña coñecimento do mesmo nin da situación que Lobeira descrebia. O CGC pensa escreber aos servizos sociais da Xunta da Galiza para coñecer cales son os programas, se os hai, que se teñen desenvolvido ou que se pensan desenvolver para loitar contra a estigmatización social da homosexualidade e a violencia homofóbica que esta xera.

Eleccións autonómicas: o CGC toma posicións

Nas últimas semanas criou-se no seo do CGC un grupo de traballo que está a elaborar unha serie de propostas para seren apresentadas aos partidos políticos. O obxectivo é que as distintas formacións políticas vaian incluindo estas propostas nos seus programas eleitorais. As propostas tocan desde a igualdade de dereitos no ámbito laboral até a cuestión das parellas de feito e da adopción. Tamén se fan propostas para a loita decidida contra a homofobia e as agresións, tanto físicas como verbais. O grupo de traballo do CGC quer, ademais, consensuar as suas propostas cos outros grupos de gais e lésbicas do noso país. Así, tras o posicionamento dos diferentes partidos, os colectivos homosexuais galegos poderán, ao menos, pedir que os gais e as lésbicas non voten por aquelas formacións que se mostren contrarias á equiparación dos seus dereitos. O grupo de traballo do CGC tamén pensa elaborar unha táboa de propostas para os sindicatos centradas, sobretodo, na negociación dos convénios laborais. Se tes algunha suxestión para o grupo de traballo non deixes de escreber ao apartado de correos ou de pasar polo local no horario de costume.



Xa sabes....
escribe-nos ao Apdo. 191
15780 Compostela
ou...
visita-nos na Rua Entrerios, nº16, Baixo,
luns e xoves a partir das 20:30